

太上靈寶首入淨明四規明鑑經

章本章第一

道者性所有 固非外而鑠 孝弟道之本 固非強而為 得孝弟而推之忠 故積而成行 行備而道日充 是以尚士學道 忠孝以立本也 本立而道日生矣 道混乎其同 同於愚智 愚智不謂道而分也 愚者昧 智者巧 昧則不明 巧則不真 不明不真 去道所以遠也 知道則廓愚 以為明去智 以成真明 真而信於道 道則為汝有矣 學道以致仙 仙非難也 忠孝者先之 不忠不孝 而求乎道 而冀乎仙 未之有也 比干殺身以成忠 生者人之所甚愛 比干不愛其身 而捨生以求道 信道有備 知其不誤 其為仙也 大舜終身以成孝 勞者人所甚畏 大舜不憚其勞 而服勞以求道 信道有備 知其不誤 其為信也 忠孝之道 非必長生 而長生之性 存死而不昧 列於仙班 謂之長生 有曰養炁延年 無功而多歲齒者 特 未得其一二爾 君子之致乎道 八八極是也 故善卷殺身以成廉 南容復圭以成慎 榮期安貧以成寬 顏回簞瓢以為裕 如是之人 皆冠於仙卿 是豈山澤之癯者哉 後世失道之人 不忠不孝

太上靈寶首入淨明四規明鑑經

清微藏書閣

以亂其國家 國家敗 乃無所容其身 乃入山以學道 是猶捨廈屋而入炎火也 子不見 民之不忠 天生聚斂之臣 子之不孝 婦生敗宗之孫 兵戈旱蝗 非國之罪也 君不忠不孝於上 臣民不忠不孝於下 無感而生 天生兵戈 為亂者 釁積於己 惡心盈而罪貫積 逆亂萌於心 天以此正其罪 假手於其人殺之爾 而曰民之無辜 豈知言哉 吾為弟子 說忠孝為本 立本以成仙 則天下之仙舉可數矣 未有不忠不孝 而參天庭奉宸極也

修身章第二

忠孝則無罪戾 去禍遠矣 服鍊則無妄偽 無妄偽則身安矣 服鍊者 以心達心 以性達性 心性洞達 其光煥發 回丹田之炁 而歸天宮 還元精之炁 而歸大海 不以外物累 而形骸不能拘也 榮華不能誘也 知足常足 煩惱遠矣 知和而和 是非消矣 身不自有 何有於物 外物不染 何有於妄 其心性真 其精神足 晝則無妄覺 所為者真也 夜則無妄夢 所安者固也 攝意歸于身 攝想得乎正 其無蒸然 其神廓然 其見飛飛然 以神交神 神者自神 以炁奪炁 炁出太空 太空之中 其神卓然 卓然不蕩也

不蕩之心性也 不蕩之性心也 心性調 而符藥為筌蹄 而可棄也  
上士非必入山 絕人事 去妻子 入曠野 捨榮華 而謂之服鍊  
服鍊心性 心明炁達 孝弟不虧 與山澤之臞童者異矣 知吾道  
者 不難行矣 以心達心 以性化性 性止於一 心止於神 心性  
圓融 而自長生 得長生而自變化 上道不難知 上道則甚易也  
小人捨易以求難 初入淨明忠孝之道 當求其易 得其易則不患其  
難也 可則心性之明徹 洞達人所固有非偽為也 得真常之道 道  
斯在也

### 建功章第三

天下有妙道 聖功生焉 神明出焉 神明者 心出為神 性出為明  
有功以達 夫道不昧吾之心性也 無功以失乎道 則去心性之道  
心不明而性不神也 上士得道之妙 在心性即真 而妄者遠矣  
遠於妄 所以成功也 一思而鉛汞生 再想而黃芽茁 三想而虎龍  
交 寶鼎安矣 慶雲生矣 心性之了辯故也 於此 而積所習 知  
所尚 何謂所尚 尚乎仁義忠孝 忠孝備而成本 可以立功 立功  
之道 無陽福 無陰愆 無物累 無人非 無鬼責 所以上合於三

## 太上靈寶首入淨明四規明鑑經

清微藏書閣

元 下合於萬物也 下士呼符水 治藥餌已 人之一疾 救人之一  
病 而謂之功 非功也 此道家之事 方便法門爾 吾之忠孝淨明  
者 以之為相 舉天下之民躋於壽 措四海而歸太平 使君上安  
民自阜 萬物莫不自然以之 將舉三軍之眾 而神於不戰 以屈人  
之兵 則吾之兵 常勝之兵也 以吾之忠使不忠之人盡變以為忠  
以吾之孝使不孝之人盡變以為孝 其功可勝計哉 何則有妄有真  
惟天下之至真 可以攝天下之人妄 忠者盡忠殺身不畏 孝者盡孝  
雖勞不惡 則天下之甚真也 上士以真冥妄 妄自清矣 則天下之  
功成 況於人乎 況於鬼神乎

### 成終章第四

學貴乎始 必有乎終 天事始乎春 至冬而歲成 地事始乎東 至  
北而化成仙 學始乎孝 至道而學成 上士以文立忠孝 中士以志  
立忠孝 下士以力致忠孝 昧道者反此 不有於忠孝 何謂上士以  
文立忠孝 以言為天下唱 何謂中士以志立忠孝 以行為天下先  
何謂下士以力致忠孝 以身為眾人率 如此者 南昌上宮著名 昇  
籍入仙 而忠孝之道終矣 昧者反之 不孝不忠 故不成乎道 生

則犯禁 死則犯科 犯禁者治於官 有典刑 犯科者治於幽 有反  
報 不忠者有臣禍 不孝者有子禍 不廉者辱 不慎者橫逆 不寬  
者惱 不裕者貪而常不足 不容者多所觸 不忍者自罹其毒 故生  
而不廉死之魂 為人則侶優 為鬼則順 為物則牛馬 生而不怯死  
之魂 為人則士卒 為鬼則戮 為物則六畜 凡即此 可以類推也  
是以知道者畏之 謹心誠八極 立八極以為基 立基以明立性  
心性明 則不期於神 而神自神 謂之淨明 淨明之習 忠孝以為  
習 積忠孝之道備矣 何謂淨 不染物 何謂明 不觸物物 不染  
不觸 忠孝自得 生乎由是 死乎由是 忠孝立 而心性得矣  
太上靈寶首入淨明四規明鑑經竟

天運辛卯年戌月正一天師清微弟子洪鼎堅率門人

羅大英 安羅飛恭錄彙編

# 太上靈寶首入淨明四規明鑑經

清微藏書閣